

Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaat nr. 18, 31. oktober 1996-imeersumi § 9, imm. 1, § 10 aamma 33 naapertorlugu kingullermik Inatsisartut inatsisaat nr. 17, 3. december 2009-meersukkut allanngortinneqartoq, aalajangerneqassaaq:

Atuuffiit

§ 1. Nalunaarut kalaallit angallataannik 24 miiterimik tamaat naallugu takissusilinnut (t.n.) imaluunniit sinnerlugu nalunaarsorsimasumik inuussutissarsiorluni aalisarnernut atorneqartarpoq.

Inuttalersuineq pillugu malittarisassat

§ 2. Inuttaasut officeriusut minnerpaamik 60 %-ii inuussapput

- 1) inuit pineqartut tamarmik Kalaallit Nunaanni najugaqartutut inuit nalunaarsorsimaffianni nalunaarsorsimassasut, Kalaallit Nunaannilu inuit aqqisa nalunaarsorsimaffianni qaammatisiutit ukiuini kingullerni marlunni nalunaarsorsimassallutik, aamma
- 2) inuit pineqartut tamarmik Kalaallit Nunaannut tamakkiisumik akileraartartussaataaassapput, qaammatisiutillu ukiuini kingullerni marlunni Kalaallit Nunaanni tamakkiisumik akileraartartussaataasimassallutik.

Imm. 2. Tamatumunnga atatillugu angallammi inuttaasut imatut inissisimasut officeritut paasineqassapput:

- 1) angallatip naalagaa,
- 2) aquttut,
- 3) igasoq/pilittaq,
- 4) qaavani sulisut naalagaat aamma
- 5) suliffissuarmi pisortaq aamma suliffissuarmi aqutsisoq.

§ 3. Taakku inuttaasunut ilaasut aqumiut, tassaassapput:

- 1) inuit pineqartut tamarmik Kalaallit Nunaanni najugaqartutut inuit nalunaarsorsimaffianni nalunaarsorsimassasut, Kalaallit Nunaannilu inuit aqqisa nalunaarsorsimaffianni qaammatisiutit ukiuini kingullerni marlunni nalunaarsorsimasimassallutik, aamma
- 2) inuit pineqartut tamarmik Kalaallit Nunaannut tamakkiisumik akileraartartussaataaassapput, qaammatisiutillu ukiuini kingullerni marlunni Kalaallit Nunaanni tamakkiisumik akileraartartussaataasimassallutik

Imm. 2. Kalaallit Nunaannut nunat tamat aalisartarfiini pisassiissutit atorluarnissaat anguniarlugu, inatsimmi imm. 1 nr. 1-imi 2-milu imm. 1-mi piumasaqaatit eqqaaneqartut inuttaasut 50 %-i qummut tikillugit immikkut akuersissummik tunisisoqarsinnaavoq. Qinnuteqaat Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq. Immikkut akuersissutininik pisoqassappat angallatip aallannginnerani suliarineqareersimassapput.

§ 4. § 2imm. 1, nr. 1 aamma 2 aammalu § 3, imm. 1, nr. 1 aamma 2 naammassineqarsimanersut pillugit nalilersuinermi, Kalaallit Nunaata avataaniikkallartarnerit naatsorsuutigineqassanngillat. Avataaniikkallartarnerit qaammatinit 14-init sivikinnerussapput. Inuk pineqartoq atorfininnerup nalaani Kalaallit Nunaanni najugaqartutut inuit nalunaarsorsimaffianni nalunaarsorsimassaaq, kiisalu Kalaallit Nunaannut tamakkiisumik akileraartartussaataaassalluni.

Imm. 2. Inuk ilinniarnerninut atatillugu Kalaallit Nunaata avataaniissaguni, § 2 imm. 1 nr. 1 aamma 2-mit, aammalu § 3, imm. 1, nr. 1 aamma 2-mit immikkut akuerineqarneq pillugu qinnuteqarsinnaavoq. Qinnuteqaat ilinniarnernut uppersarsaammik imaqaassaaq. Assersuutigalugu uppersarsaat tassaasinnaavoq soraarummeersimanernut uppersarsaat, imaluunniit ilinniagaqarfissamut inuit tiguneqarnerinut uppersarsaat. Qinnuteqaat uppersarsaatillu Aalisarnermut, Piniarnermut Nunalerinermullu Naalakkersuisoqarfimmut nassiunneqassapput. Immikkut akuersissutininik pisoqassappat angallatip aallannginnerani suliarineqareersimassapput.

Imm. 3. Immikkut akuersissut ukiunut marlunmut atuuppoq.

§ 5. Inuttaasut ilaat uku, maskiinalerisut naalagaasut maskinmesteriusullu kiisalu tekniikerit, suliffissuup atortorisarutaanik aserfallatsaaliuinermit taamaallaat suliaqartut, § 2 imm. 1, aamma § 3 imm. 1-mi malittarisassanut ilaatinneqanngillat.

§ 6. Aalisarnerup nalaani angallammi inunnik sulisussanik atorfinitsitsinermit, § 2 imm. 1 nr. 1 aamma 2, kiisalu § 3 imm. 1 aamma 2, eqqortinneqarnissaat atorfinitsitsisup akisussaaffigaa.

Imm. 2. Kalaallit Nunaannut atorfinitsinneqartup attuumassuteqarneranut uppersarsaat uppersarsaatiut immersuiffik atorineqarsinnaavoq, ilanngussaq 1 takuuk.

Imm. 3. Atorfinitsinneqartup atia, atorfiup taaguutaa, Inuup-normua kommunilu najugaqarfia kiisalu pineqartup § 2, imm. 1, normu 1 aamma 2 naammassisanerai, atorfinitsitsinermit atatillugu aalisarluni angalanernut inuttalersuinermit allattuivimmi allanneqassapput kingusinnerpaamillu angallatip aalisarluni aallalernerani allanneqassallutik.

Imm. 4. Inuttalersuinermit allattuivik ilanngussatut 2-tut ilanngussimasoq atorineqartussaavoq. Kalaallit Nunaanni Namminersorlutik Oqartussat nittartagaanni [www. nanoq.gl/gflk-ikkut](http://www.nanoq.gl/gflk-ikkut) pissarsiarineqarsinnaavoq. Allattuivittaaq Kalaallit Nunaanni Aalisarsinnaanernut Akuersissutininik Nakkutilliisoqarfik, (KANUAANA) attavigalugu, postboks 501, 3900 Nuuk, imaluunniit e-post gflk@nanoq.gl-ikkut pissarsiarineqarsinnaavoq.

Imm. 5. Inuttalersuinermit allattuivik uppersarsaatinut immersuivilluunniit KANUAANA-mut umiarsuup ingerlarnanik nalunaarsuivimmut ilanngullugu nassiunneqassaaq.

Imm. 6. Angallatit qarasaasiakkut umiarsuup ingerlarnanik nalunaarsuivinnik nassiussisussat, inuttalersuinermit allattuivik uppersarsaatinullu immersuivik qarasaasiakkut nassiutissavaattaq.

Pineqaatissiisarnerit

§ 7. § 2-mik, imm. 1, aamma § 3-mik unioqqutitsinerup, Kalaallit Nunaannut pinerluttulerineq pillugu inatsimmi malittarisassat naapertorlugit akiliisitsissut kingunerisinnaavaa. Tamannattaaq ingerlatseqatigiiffinnut atuuppoq.

Atortuulersitsineq

§ 8. Nalunaarut ulloq 1. januar 2012 atuutilersinneqassaaq.

Imm. 2. Atuutilersitsinermi kalaallit aalisariutaannik inuttalersuineq pillugu Namminersornerullutik Oqartussat nalunaarutaat nr. 35, 28. oktober 1993-meersoq atorunnaarsinneqassaaq.

Kalaallit Nunaanni Namminersorlutik Oqartussat, ulloq 17. november 2011.

Ane Hansen

/

Jens K. Lyberth

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut